

անձնավորութիւնները, հոգեորականներն ու նրանց զավակները, ինչպես և իբրև առևտրական ցուցակագրվածները, եթե նրանք ապրում էին գյուղում: Գյուղը ստանում էր համադասակարգային²³ բնույթ: Այդ պատճառով գյուղական հասարակութիւնն իրավացի էր համարում այդպիսիներին ընդհանուր հողից բաժին հանելը, սակայն և դիմադրում էր, երբ դրանք իրենց դասակարգային առանձնաշնորհումներից օգտվելով, խույս էին տալիս գյուղի վրա ընկնող տուրքերի վճարմանը մասնակցելուց և հասարակական պարտականութիւնների կատարումից:

«2. Հասարակութեան ոչ անդամ մեկը, այլ վերաբնակվածը պսակվելով մեռած տանտիրոջ ժառանգ աղջկա հետ՝ դառնում էր հասարակութեան անդամ՝ և բաժին էր ստանում հասարակական հողերից:

«3. Զկար հողի հարկադրական մշակում, բայց եթե մեկն իր հողաբաժինն անմշակ էր թողնում երկար ժամանակ և չէր օգտագործում, մեկ ուրիշը, ով որ շուտ հասներ, իրավունք ուներ այդ հողը վարելու և իր օգտին ցանելու:

«4. Ոչ ոքի արգելված չէր անասունն արածացնել արտամիջի սահմանահողերում²⁴ և անցնել ուրիշի հողաբաժնով:

«5. Արտը հնձելուց և խոտը հավաքելուց հետո վարելահողը և խօտհարհի տեղն անցնում էին ընդհանուր օգտագործման, և ոչ ոք իրավունք չուներ արգելելու անասունն արածացնել այդ հողաբաժինների վրա:

«6. Հասարակութեան բոլոր անդամներն իրավունք ունեին ազատ քաղելու և հավաքելու ցանած արտերում ամեն տեսակ վայրի բույս՝ ուտելու կամ այլ տեսակ տնտեսական պետքերի համար:

«7. Աստվածահաճո գործ էր համարվում թույլ տալ չքավոր համագյուղացիներին հավաքել հնձած արտերում մնացած հասկերը: Ուզ գյուղում արգելվում էր այդպիսի արտերում արածացնել հնձից հետո երկու ամսվա ընթացքում, որպեսզի չքավորները հնարավորութիւն ունենան իրենց օգտին հավաքելու թափած հասկերը կամ, ինչպես տեղացիք են ասում՝ պաշար անելու:

«8. Պատրաստի խորձեր գողանալը պատժվում էր, բայց ոչ ոքի չէր արգելվում ուտելու համար հավաքել կիսահաս հասկերը՝ հէղիմբ:

«9. Սվադի համար գործածվող սպիտակ կավը, գետի ավազը, ներկատու և բրուտային կավը, կրաքարը, շենքերի քարը և գիպսը հասարակութեան սեփականութիւնն էր համարվում, թեկուզ դրանք լինեին առանձին տնատերերի հողերում:

«10. Ամեն մեկն իրավունք ուներ ազատ օգտվելու ճահիճների վրա և գետերի ափերին բուսնող եղեգներից: Ոչ ոքի չէր արգելվում գետի մեջ ձուկ որսալ և անտառում որսորդութիւն անել:

«11. Այն տեղերում, որտեղ հողերը ջրովի էին, գոյութիւն չուներ ջրի սեփականութիւն: Հասարակութեան բոլոր անդամներն իրավունք ունեին օգտվելու ջրից, թեկուզ մասնակցած չլինեին առուներ անցկացնելու աշխատանքներին:

«12. Հասարակութեան իրավունք ուներ նոր առուներ անցկացնել ամեն տեղով, առանց հողատիրոջ համաձայնութիւնը հարցնելու:

²³ «Всесословный». Егизаров С. А., Сельская община в Елисаветпольской и Бакинской губерниях. «Свод материалов по изучению экономического быта госуд. крестьян Закавказского края», т. III, ч. 2-ая, էջ 1:

²⁴ Межи.